

Sin via da darentar polizista

Praticum a Flem e scola ad Amriswil

DA CLAUDIA CADRUVI / ANR

■ **Selina Livers fa da preschent il praticum da polizista a Flem. Dacurt è ella stada confruntada cun in accident tragic. Il settember finescha ella la scola da polizia.** L'atun passà ha la scola da polizia ad Amriswil avert sias portas e beneventà 90 aspirants da polizia. Igl è in nova scola interchantunala da la Svizra orientala. Aspirants da differents chantuns frequentan la scola. Uschia era raddund 20 scolars dal Grischun. Tranter quels sa chatta *Selina Livers*.

Ils mais da stad passentan ils aspirants in praticum. Livers è l'emprim stada staziunada a Tusaun tar la polizia da traffic, ed uss lavura ella a Flem. La sonda passada è ella stada da la partida cura che la polizia ha stuì ir sin il plaz d'in accident mortal d'in bab da famiglia.

L'emprim gidantra da dentist

Tgi che less absolver la scola da polizia, sto gia avair ina clamada. Livers aveva emprendì da gidantra da dentist ed ha suenter l'emprendissadi lavurà quatter onns sin questa clamada. Entras ses ami ch'era polizist ha ella suvegnì mustgas da darentar polizista.

Ma lura è l'ami sa disgrazià mortalmain cun töf. «Nus avevan plans per il futur», di Livers. Questa frida n'ha betg facilità la decisiun da darentar polizista. Anzi, entras quest accident èsi stà cler ad

ella ch'ella vegn pli tard sco polizista era confruntada cun situaziun crudaivlas. Ella è sa dumandada: «Damogn jau quai?»

La finala è ella s'annunziada ed ha prendì nanavant ils cudeschs da scola per sa preparar sin ils examens.

Ponderà bain

Durant ils examens d'admissiun per la scola da polizia hai dà tests en tudestg, geografia, furmaziun generala ed in discurs cun in pschiater. Igl è era vegnì examinà quant fit ch'ins è. «Jau vom bler cun velo ed a chavagl e dun hockey», di Livers. Perquai na sajan ils tests da sport betg stads in grond problem.

Dal reminent: Era sch'ins vesess gugent che dapli dunnas absolvessan la scola da polizia ad Amriswil, vegn pretendì da las dunnas exact las medemas prestaziuns corporalas sco dals umens.

Lura è arrivada la brev cun la novitad che Livers haja dumagnà ils examens d'admissiun. Ella ha mess la brev intginas notgs sut il plimatsch ed ha anc inagiada ponderà bain, sch'ella duai far la scola u betg.

La scolaziun va in onn

Intgins mais pli tard ha ella cumenzà cun 24 autras dunnas e 65 umens la scolaziun ad Amriswil. Durant diesch mais han ils aspirants instrucciun en roms ch'i na dat per gronda part betg en autras sco-



La tschinta dals polizists paisa bler. Ella cuntegna in bastun, muniziun, lampa da maun, pistola, «Pfeffer-spray» etc.

FOTOS C. CADRUVI

las: criminalistica, dretg, controlla da traffic, co proceder tar accidents, sajetar, defensiu da sasez, sanudar, sport, OL, tudestg, etica, protecziun da l'ambient, instrucciun civica.

Cunzunt ils roms che han da far cun moviment e sport ha l'aspiranta grischuna già fitg gugent. Ma era psicologia saja stà interessant, raquinta Livers. En quest rom hajan ins tractà cas da la pratica, per exempel co ch'i saja d'agir, sch'insatgi provocheschia. «Nus avain emprendì che provocaziuns na van betg encunter nus persunalmain, mabain encunter l'unifurma.»

L'avust turnan ils aspirants ad Amriswil, e lura cumenzan ils examens finals. Ils 28 da settember vegnan ils emprims absolvents da la scola interchantunala brevetads.

Accident da parasgulada

Ma l'emprim ha Livers anc da finir il praticum tar il post da polizia a Flem. Là è ella vegnida confruntada dacurt cun ina situaziun difficila. «La sonda, ils 21-7 suenter las 13.00 – jau er a chasa – hai jau survegnì il telefon dal sergent *Peter Flütsch*. In parasgulader era crudà giu tranter Narauns e la Foppa.» Livers ha accompagnà

il collega sin il plaz d'accident. La Rega era gia là, ed il medi aveva constatà la mort da l'um che deriva da l'Engalterra.

Era sche Livers era l'emprima giada en ina tala situaziun, ha ella già d'agir e da gidar il collega. Els han fatg fotografias, guardà da tgi ch'i sa tracta, discurrì cun perditgas, scrit protocols, orientà l'uffizi civil etc. Il pli grev en l'entira truscha è stà d'orientar la famiglia che posseda ina chasa da vacanzas a Flem.

Maletgs ch'ins n'emblida mai

Co reageschan ins, sch'ins è l'emprima giada en ina tala situaziun? «En quel moment fan ins la lavur», di l'aspiranta. Ma la sonda saira cura ch'ella saja ida a chasa, sajan ils maletgs turnads. «Quels maletgs n'emblidan ins probabel mai pli.» Ella haja telefonà ad ina collega da scola per discurrer surlunder.

«Che l'um è mort, è uschia», ha Livers ditg a sia collega. «Ma la dunna che va la saira a letg e sa che l'um na turna betg pli! Jau sai mezza quant mal ch'i fa da perder insatgi.»

Lavur normala – lavur da biro

Livers ha anc da scriver per la scola ad Amriswil ina lavur davart in cas en il pra-

ticum. Probabel fetschia ella la lavur davart quest accident, di ella. La medema sonda è anc capità in auter accident a Faler, nua ch'ella ha medemamain già dadir sin il plaz. Igl è pia stà in di fitg dir per la giuvna polizista.

Ma ella accentuescha era che quai saja excepziuns. A Flem saja già daditg betg pli capità in accident mortal. I dettia era tar la polizia blers dis ch'i saja da far lavur normala. E quai è sco en autras clamadas lavurs da biro.

Dapli infurmaziuns davart la scola chattan ins sut www.polizeischule-ostschweiz.ch

Curt e bun

Num: Selina Livers

Naschida ils 7 da fanadur 1981

Burgaisa: da Breil

Creschida si: a Flem

Domicil: Favugn/Amriswil

Hobby: ir cun velo, ir a chavagl, curre

Taidla gugent: Radio Grisch

Spaisa preferida: salata e spaghetti

Bavronda preferida: rivella

Lieu preferì: il pass dal Cuncas



Durant il praticum ha mintga aspirant in padrin. A Flem ademplescha il sergent *Peter Flütsch* questa funcziun.